

Meeqqat Inussuttullu Pillugit Ilisimasaqarfik (MIPI) pillugu Inatsisartut inatsisaata nr. 26, 18. december 2003-meersup siulersuisut 2008-mi ukiumoortumik nalunaarutaat naapertorlugu siunnersuutigineqartut najoqqutaralugit allanngortinnissaanik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Naaja H. Nathanielsen, Inuit Ataqtigiit)

Akissuteqaat.

(Isumaginninnermut Naalakkersuisoq)

Siullermeerneqarnera.

Naaja H. Nathanielsen Inuit Ataqtigiinneersoq qujaffiginiarpara MIPI-p siunissami inuiaqatigiinni atuuffissaanut Naalakkersuisut takorluugaannut naleqquttumik siunnersuummik saqqummiussaqqamat.

MIPI-ip pilersinneqarnerminiilli meeqqat inuussuttullu tungaasigut qitiusumik ilisimasanik amerlisaanissaq eqqarsaatigalugu inuiaqatigiinni isumaginninnikkut pingaaruteqartumik inissisimavoq. Tamanna meeqqat inuussuttullu tungaasigut tapersersuisumik politikeqarnerup ilusilersornissaanut pingaaruteqartumik ullumikkut piareersimanerunitsinnut tunngaviliivoq, maannakkummi ilisimasat aallaavigalugit piffissaq ungasinnerusoq isigalugu aaqqiissutissat, ilimagisat aallaavigalugit piffissaq qaninnerusoq isigalugu aaqqiissutissat taarsersinnaammatigik.

Taamaammat aamma Naaja H. Nathanielsen ugguuna isumaqatigaara piginnaasaqarfiit MIPI-p ingerlatai arlaatigut inerisarnerisigut paasisutissiisarnerit siunnersuisarnerillu ilanngunneqarsinnaassammata.

Qanittukku MIPI-p siulersuisuunik ataatsimeeqateqarninni siunissami MIPI-p suliassai oqallisigineqarput. Ataatsimiinnermi Naalakkersuisut pilersaarutaat saqqummiuppakka, tassalu meeqqanut inuussuttunullu siunnersuiffiutigisumik sullissivimmik MIPI-p peqataaffigisassaannik pilersitsinissamut pilersaarutinut tunngasut. Sullissiviup suliassarissavai ilisimasaqarnerulersitsinissaq, ilisimasanik siammarterineq aamma ilisimasat nutaat ilisimariikkallu tunngavigalugit soqutigisaqartut siunnersortarnissaat.

MIPI-p siulersuisui siunnersuummut tapersersuipput, kisiannili peqataanik erseqqissarlugu siunnersuisarnissat politikimut pituttorsimassanngimmata, sulinissamullu nukissat annertusartariaqartut. Ilanngullugu siulersuisut erseqqissarpaat, meeqqap qitiutinneqarnissaa ingerlaannassamat. Siulersuisut isumaannut isumaqataavunga, paasisinnaallugulu sulisutigut aningaasaqarnikkullu nukissanik annertusaasariaqaratta, sullissiviup siunnersuisoqarfiutigisup suliassat tunniunneqartut suliarisinnaassappagit.

Naalakkersuisuni suli inaarutaasumik aalajangiisoqanngilaq aaqqiissuussinikkut aaqqiissutissaq sorleq tulluarnerusoq inerneriumaarneraa. Meeqqat pillugit siunnersuisoqatigiit, meeqqanut ombudsmandi, MIPI-p piginnaasaqarfiisa inerisarinnissaat il.il. eqqartorneqarput. Siunnersuutit taakku tamarmik isiginiarneqarput, kisiannili inaarutaasumik aalajangiisoqartinnagu suliassaqarfinnit taakkunanga sorliit tulluarnepaanersut misissorluarneqarnissaat kissaatigaarput aammalu qanoq isillutik meeqqat inuussuttullu

tungaasigut tapersersuinnermut sullissinermullu ajunnginnerpaamik
ataqatigiissaarneqarsinnaanersut.

Tamatuma kingunerisaanik Isumaginninnermut Naalackersuisoqarfik nassuiaammik suliaqassaaq, tassanilu misissorneqassaaq sullissivik siunnersuisoqarfiutigisoq meeqqat inuusuttullu tungaasigut Naalackersuisut ataatsimoortumik periusissaannut ilanngunneqarsinnaanersoq. Nassuiaat Inatsisartut 2010-mi upernaakkut ataatsimiinnissaanni piareersimassaaq.

Naaja H. Nathanielsen ugguuna isumaqatigilluinnarpara MIPI-p suliaanut killiliussat erseqqissarneqarnissaat pisariaqarmat, peqataanillu pingaaruteqarmat qularnaassallugu MIPI-p ilisimasaminik amerliartortitsinerata inuiaqatigiinnut paasissutissiissutiginnissaa. Ilisimasat ilisimariikkagut atorluarnissaat pikkoriffiginerusariaqarparput, aammalu qulakkeertariaqarlugu inuit ilisimasanik pisariaqartitsisut ilisimasariaqarmassuk ilisimasat pigineqarmata sumilu nassaarineqarsinnaanerat. Nalunaarusiat, misissuinerit assigisaallu iluaqutaanaviangillat ilisimasat tassaniittut paasissutissiissutigineqanngippata atorneqarlutillu.

Naalackersuisut inassutigaat siunnersuut taamatut isikkoqartillugu akuerineqassanngitsoq aaqqissuussinerit, akisussaanerit sumullu inissiinissat il.il. pillugit isummersuutit massakkut suli naammassineqanngimmata.